

黃渡鎮志卷七

里人章樹福清甫氏纂輯

人物

隱逸

明

李僕字懷谿居石家村讀書自好力耕以給其家嘉靖中倭寇猝至邨中男女扶幼竄入棘叢僕方衣襪袂插禾田中或告之曰寇至徐應曰不耕不可以得禾去將安之寇亦不爲意

龐琛字廷貴號拙逸善草書得懷素體授徒自給足不入城市嘉靖間屢舉鄉飲

周賓王字用之與弟賓日同補諸生值明季役困里中解戶多破產逃命獨賓王兄弟讀書傲廬中晏然自得聞雲間社事方興欣然赴招見同社相尙氣節慮以文章賈禍乃韜晦聲跡僻居邨舍日惟携杖過橋造其從子家談笑達暮而返晚號于于道人

國朝

吳泰字去驕又字一侗新安人客遊旣久老吳淞之濱工書通琴理尤擅畫蘭性清簡方靜早

歲喪偶終身子寄不善飯日事餽粥略飲酒而止癯貌長身烏巾赤烏古致充溢羅漢寺僧休明于泰爲子姓行延之院中泰安之鑪香鑪茗時藉七絃怡情有索書雖老不倦或呼之爲老僧亦不異康熙初時年九十七自署百歲老人謂合閔已得期頤也又二年而終其歿年猶扶杖徒步廿里訪張忍翁柯以傳煇寫圖于扇以贈之

汪楷贈吳一侗五湖託高蹈汗泥出蓮房百年猶日暮千歲未云長滔滔淞江水東去迴瀾狂水雲相綢繆煙霞結漁莊蒹葭變霜露松筠率其常中有黃眉翁白須何飄揚問年一百一五色繡詩腸書法龍蛇動畫楮鶯花香每說昇平事悲歌意不忘行藏何去處四海一繩牀

張大綱字舜民所居有寶忍堂在陸皎浦門庭清逸蒔花賦詩時揚州王中陽尊五流寓黃渡大綱以丹桂閣居之日與王升孟堅王非園璣輪流觴詠其中每譙無二味號爲一品集璣製滿庭芳詞以紀其事

王璣詞北斗才華南州聲望客星又照江樓檻前江水攔不駐東流喜天涯萍水客恰如逢逐浪浮鷗蓋無二鱸魚斗酒非婦也能謀笑談當今夕有千般喜有萬種愁歎蘭亭赤壁

陳迹空留休論勳名蓋世只博得醉裏封侯縈心曲竹西鼓吹留待廣陵秋

錢嘉猷

吳淞江雜事詩注作斯來

字皇士一字綏臣武生工詩善行草書築東臯別墅于吳淞之陽賦詩見志

和者甚夥自號就閒居士劉昌復起爲錄就通店唱和詩長卷詞翰雙美藝林賞之

孔毓書字魯原號東巖能書由華亭贅居紀王鎮後家黃渡葺一室于吳淞濱客至彈琴觴詠有逸士風

范逸和東巖韻幽人卜居處乃在清江潯如彼求聲鳥嚶嚶來好音相思每相過與至恒披襟有時觀臨池談諧雜鳴琴高柳三五株可以發長吟自春忽徂夏益我一何深况子素王裔微言猶可尋直道恆栖栖此事詎由今吾子領其要翛然隨陸沈

周泰圻字宏鎮號玩泉業醫喜植盆樹宅南闢地爲花園早起治圃畢徒步爲人治疾日哺歸易芒屨擔水入林至煙暝月上徘徊不欲去所居深池廣宅清曠絕人齷齪子不敢近金教授襄贈聯云栽花別有藏春隴開徑清于埽葉莊蓋實錄也祁岡郁樸善醫種樹與泰圻同交亦最善故近談盆植者朱稚征而後推兩家焉一日盜踰垣竊其家具及卉木泰圻憤甚訴諸縣令閱其狀羅列楡檜數十種不及財物令婉言釋之而稱其有癖爲人清介拔俗瞻給業師至

沒齒不倦臨終以手植屬付諸友語丁寧也

朱用章字含萬號古愚諸生少孤撫諸弟有恩性恬澹隱居戚浦上繞屋植梅平生詠梅句幾半其集弟子金如圭字孚達畫筆蒼老性潔如其師

藝術

國朝

金南蓀字九韶印從孫嗣其醫傳有求治者必急趨之多奇中聞在上志稱邑中以醫濟世首推金氏順治中邑令張令儀以海邦國手額獎之

王永芳字安廬居錢家堰精九章算術著歷學指南三卷爲時所推工竹刻刀不苟下每置一器歷數旬乃成與同時沈兩之朱幼芳齊名爲朱稚征再傳弟子盡得其技性簡遠終歲不入城市人鮮得其手迹時里中龐泰徐孔文亦工此技龐尤以陰文擅勝

案永芳見吳桓志藝文考及陸廷燦南邨隨筆皆不載其里居茲據陸曰壽吳淞江雜事詩

注錄入

張□□字秋野監生天才牢落詩有逸致尤工畫山水竹菊弱冠偕夏時中入都不遇而歸家

有詠歸草堂時與吳廷選姚熙二范輩對花引酌酒酣濡筆求畫者無不滿意而去

李元素字師白居陸皎浦精畫人物偶作山水亦超妙入神今畫苑盛稱之

葉周德字觀成原名奏字警遷諸生才膽氣雄詆諧好辨人莫撓其鋒書宗松雪羅漢寺有松雪楹帖遺其一周德補書之眞質莫能辨傲睨當世卒以窮困死

楊春榮號杏庵曾遇異人授祕方明斷善用藥數起危疾晚寓市北斗姥閣虔修煉引之術輒有神應

汪桂發字古香工書手神瀟灑隱于賣卜

杜翼字周臣居陸皎浦善畫花鳥以其技授外孫許國柄國柄稱畫牡丹能手得翼之烘染法也

沈詮字臣表少與陳曉善曉工繆篆鐫竹器爲人物山水銓倣之皆入能品又善鼓琴得前手指法性耿介家計日窘盡屏所嗜服賈三十年既老歎曰吾久失偶又無子蹤跡如苦行僧尙安以家爲乃依其甥錢宮詹大昕終日焚香撫琴而已曉字爾良號雪笠

葉潛字蒼雨諸生善畫山水隨意揮灑好立奇境性僻不肯爲俗子作寸幅同時有孫瑤泉鐸

工墨竹陸曰壽搜兩人遺墨并吳泰畫合裝題云無聲詩句少流傳姓氏誰教畫苑編孫竹吳蘭葉山水盡從過眼化雲煙滑子錦字芳秦

陳兆龍字麟如號清恒居北鎮中市工白描法深得李龍眠神髓年三十有子三俱痘殤妻亦卒棄家遊京師以繪事見知于傅相國恒名動達官得金盈篋即散給相識之困乏者後以軌法得罪幾論死相國力爲營脫晚乃入蜀時同里章盛業官中江留之官舍日惟以畫自給旦晚不釋手至摩大士像則宿齋晨起作數筆卽止故獨得通神之技蜀中黃州會館以兆龍所畫大士供奉鄰寺一夕寺中火忽聞佛堂鸚鵡聲喚救火急趨之悉力撲滅蓋像上有白鸚鵡見異云蜀人奇之稱爲陳菩薩臨歿屬盛業曰蜀中山水最佳可埋我骨但以竹杖付我家使耐葬于吳塘先人墓側是卽魂返故鄉矣卒年八十三盛業葬之公山麓爲誌其墓章旋卒官而竹杖亦化去

章盛業都門贈陳麟如才大應知用亦難廿年猶見駐長安將軍善飯何曾老高士無衣不道寒但覺蕭疏同市隱幾曾經畫到微官近時楊馬蒙恩厚尊酒相逢且盡歡

姚葵字心若號拔夫少習舉子業隨棄去畫山水宗倪雲林派澹遠有神韻爲人氣宇落落其

自得之致悅于蒼崖白石間寓之子鐘字粲谷諸生亦工畫

吳家經字叙九號寶楞先世浙西人業鹺入資授湖南安鄉江華攸縣丞擢知龍山縣事註誤鐫級優游里中二十年日惟濡毫作書藉以自遣髫齡時鄰家有度曲者家經信口率和無誤節自是兄弟四人皆嫻音律每花晨月夕泛舟江上長蘧一聲聞者知爲延陵羣從也晚年補安徽按察使照磨卒于官

楊德曙字旭亭春榮孫醫學與箴山何世仁齊名吳桓志稱其博覽羣籍善治險症往往出人意料表邑令姚學甲以活人國手四字獎之兄子寬字敬敷能世其業

章駿業原名信字愷誠號水南家故貧艱于脩脯幼卽廢學成童時見鄰兒于壁上錄四字書作頑耍因以不讀書爲恥乃隱自切究性開敏過目輒成誦長遊吳吳舍人泰來一見稱賞招致門下與其子給諫君紹昱相切劘學大進入資補浙江樂清縣巡檢題署杜瀆場鹽大使居官簡靜泊乎寡營惟歌詩篆刻爲樂摩印專宗三橋文氏而刀法腕力有過前人每以此見稱當路母年八十餘告假省親歸舟無長物惟昌化山石數籠而已

王圻字觀天號侶鶴少受知邑令葛建初年六十始食餼七十二而準貢中年授徒紀王鎮因

寓居其地畫山水長于氣韻老年所作識者擬之黃鶴山樵梅道人云舉鄉飲大賓

馬權字德輿號季伯廩膳生詩思綺麗喜倣宮體有百憶詞一卷皆其少作工真行書及篆刻授徒萬家宅邨人掘地得古甌數十權購之倣刻秦漢瓦當摩挲以供玩賞

洪樸曰季伯爲文以鴻博絕麗爲宗癸酉省試闈中夢老人授以木槃中置二爵喜以爲必售榜發被黜尋以病死嘗謂余曰使我有負郭田二頃插架書萬卷閉戶十年所造當有不盡于是者亦可以見其志已

遊寓

元

趙孟頫字子昂宋秦王德芳之後宋亡以程鉅夫薦授兵部郎中累官翰林學士尋乞歸風流儒雅爲有元一代冠冕嘗得古琴曰松雪因號松雪道人有松雪齋詩詞集邵復孺評其詞曰孟頫以承平王孫而櫻世變黍離之悲有不能忘情者故長短句深得騷人意度配管氏居華亭之小蒸孟頫逗留久之居恆意態忽忽獨往峯泖閒放情自適尤愛吳淞風土數泛舟其地歿後鄉人思之有衣冠墓在黃渡

黃渡鎮志

卷七

六十七

趙孟頫吳淞江上作壯氣浮孤劍餘生寄短篷戰塵昏夜色積雪泥春風北望旌旗闊南歸郡邑空江花與江草客思兩無窮

明

董其昌字思白號元宰華亭人

李紹文人物志作上海人

萬曆十七年進士由翰林歷官南京禮部尙書書畫

妙天下而賦性閒散有田數頃在曹家浜兩岸居家時每值秋收恒自到鄉故常往來黃渡喜作書畫以給佃戶今其地尙多筆墨流傳

國朝

唐瑀字孺含一字仙佩號雪井常熟人授徒槎谿復館黃渡善詩和蘇臺楊柳枝詞爲汪太史琬激賞招致堯峯應維揚趙權使聘平山堂大會詞人以瑀作壓卷兼精八分篆隸有晉唐人筆意

徐杏輔字芳來崑山諸生幼有神童之目弱冠艱于家食偕弟梅輔授徒黃谿湛深經術攻苦十年發而爲詩凝然而靜得和平中正之音時諸進士嗣郢陸觀察振芬爲風雅宗主九峰雅集中得杏輔詩如眉著目舉座傾倒遊山左館衍聖公第歸而講學星谿之士晚居滄瀆邨與

徐山人筠有南北徐之稱

半邨詩草自序云余童時從葉西來先生遊弱冠授徒黃谿谿上范同叔遺民昆弟長于詩者余與唱和有年頗得薰陶之益

諸嗣郢曰芳來恂恂粥粥若不勝衣對之令人鄙吝盡釋余固知其爲少年有養之士及讀其詩大約體質高雅詞氣和平不發牢騷不衿險怪悠然自遠求之唐宋以來詩人中未易多得也

劉起字韓杼號昌復歲貢生家嚳城授徒北鎮李氏與范逸夏時中僧重徹相友善三人以詩名而起以草書相頡頏乾隆己未再客渡頭三人先後謝世矣起年八十獨以老病存因輯生平投贈之作合刻成帙爲覆瓿集謂其子藻甫曰卽日與諸君泉下相見庶無愧色爾

俞嘉客一名諤字韋示

芥軒詩存作自

號逃庵武林人父慈成明季以大臣薦入都託病歸寓邑之莊

谿嘉客事親以孝聞許采臣旭延之圭家塾

案旭原藉太倉後遷黃渡蒲楊山房詩話謂其與陶龍徵交

後偕殷警齋銘主白沙

社詩沈著有力五言尤勝有三申草堂集野客閒言俱散失

范逸寒夜重過韋自同許采臣小飲渡頭煙景暮木落山蒼蒼遙愛碧流水尋源向草堂故

黃渡鎮志 卷七

六十八

人雙扉開佇立正相望許子適青谿此時返野航青眼其相對依依燈燭光感茲經旬別勸

我盡一觴酒酣發長謠月出江之陽孤邨天氣寒地白如履霜起立嚴風前浩歌彌激昂

王堅

一作爾堅

字升孟諸生能詩善畫幼隨父焜自崑山寓居黃渡二十年時張原雅詩及從子鵬

翀並設絳于鎮之北鄉與堅舊好文社詩壇風雅最盛陳兆植書齋雜詠僧蔭天煎茶吟社鵬翀幻花分課皆其時也康熙末焜司鐸丹徒堅侍養任所仍歸舊鄉以嗣子鳴盛貴贈通議大夫

汪存夜字永安自號叟否世居休甯父起遷諸翟鎮存夜入華亭籍補諸生喜引先哲格言以教後進世推爲有道者假館戴嘉賓家歷寒暑十五久敬如一日滬城沈翰宣亦藻爲寫氈幃夜話圖以誌賓主相得之誼著有歷朝改元錄建文紀年明璫錄紫隄邨志以子宜耀贈舒城縣訓導

洪清遠字豫章嘉興府學廩生寓居質庫中學問淵雅好獎植後進一時間字者翁從之指授弗倦不責脩脯里中如曹志霖葉潛錢鏡明輩皆出其門下年未五十歿于旅舍

秦倬字天采號訥庵居嚳城南門外以諸生久困場屋勵精帖括日試七藝不倦乾隆戊辰成

進士知雲南江川縣以計典罷其未達時假館南鎮吳氏與僧佛義交有癸卯讀書羅漢寺詩所著有三餘錄資治通鑑備編別有泥蟠日記自序云館黃渡時作

周灝字峻瞻號芷巖與族子笠並以畫竹名閒作山水有元四家之長尤精刻竹不假稿本自成邱壑用刀如用筆當時以爲絕品數至黃谿李言闢室館之故其手蹟里中藏弄最多蒼髯白髮古貌古心不類塵世閒人自號髯癡性嗜酒旣耄猶豪飲若少年嘗醉臥深雪中達曉見者驚爲已死灝方欠伸復睡或傳其壯時瘍潰不可治有道人餌以丹遂愈年八十九

吳衍慶贈周芷巖畫家神品與逸品並享高名永不滅若非胚胎天性來焉得宗傳襲衣鉢倪吳黃王元四家岳石一派爲正脈比來婁東王奉常落筆氣韻何超越虞山王翬石谷子揮灑煙雲橫衝突此後妙繪更何人練川周君稱傑出十日五日笑經營一水一石成頃刻層巒疊翠金碧山道染紙上淋漓溼屏幃巨幅隨所爲四座環觀歎奇絕有時掀髯得意來醉拈秃筆出腕力揮盡一斗險巖漿倏見琅玕出東壁文湖州與夏太常隔代馳名相鼎立而我耽吟無他好燭得君畫如拱璧雲蘿書屋月映梁知君坐對遙相憶還期蛩駟不相離日日歌呼浮大白

張連字器之號梅泉鈍閑詩老錫爵孫也弱冠補諸生耽吟善畫能世其家風有吾友于齋集陸梯字漸之號亦亭工詩古文有蠹餘草並館南里陸氏

張春源字嘉樹號梅坪青浦諸生少孤貧不能爲生應省試屢薦不售僦居嘉定之外岡爲黃渡馬王二姓邨塾師喜讀律不爲章句學里有識者醵金贈之乃出遊落魄京邸錢獻之玷遇之旅舍叩其所學薦之中丞幕中楊伯谿護委理部案平反大獄練才達識當事爭相折節入資以通判試用湖南官至郴州知州

黃承志字秋槎休寧人習賈耽吟時爲室人所嘲僑寓黃谿廿年而詩成所居有妙月軒與洪心園樸爲莫逆交旣老樸序其稿携歸皖刊存里中者惟紅葉詩數章而已

釋道

宋

歐法師居崇真道院紹興九年有雲遊道者與歐居數日別去期三日後再來可戒酒肴待我如期果至飲甚歡就歐掌中教爲符訣自此醮祀伏壇屢著神應後立化

國朝

德徹覆韻詩草

字睿開號笠庵上海人姓唐披薙于羅漢寺從百愚禪師嗣曹洞宗派赴浙中麻

谷寺主法席晚年仍歸渡頭約二范輩結江臯吟社工篆隸畫蘭范超書墨蘭禪三字顏其居

臨逝詣道友言別端坐而化緇白奔送者相接焉

德宗一作明宗

字恒達幼祝髮逢陣墩受法于百愚禪師道力精進繼移錫同里之森森庵庵圯募

葺畢乃去住持嚶城西隱寺寺自明季火燬久不治德宗虔募重建復捐鉢資造華嚴閣裝檀

香佛像僧臘七十二無疾而終

政先字證宣號雪鑑羅漢寺僧師德徹以風雅見推詞壇政先盡得其傳汪存夜假館黃翁晨

夕過從相與談道不倦投贈詩什具載存夜吟集

法鴻香林庵僧通經典虔修苦行收焚字紙寒暑不輟晚歲學吟韜晦不稍露人莫能窺其涯

淡

佛義號雪谷羅漢寺僧通琴理能詩傳其送春句云嘯鳥尙留相識樹落花偏向奈何人尤善

隸學古峭得漢人筆意畫蘭亦有逸致嚶城秦進士倬讀書寺中訂爲方外交三傳至祥雲字

青乘並工草隸與修梵宮其徒肖像祀之

黃渡鎮志

卷七

七十

蔭天歎縣人俗姓孫住持香林庵精茗事亦能詩嘗邀夏時中張鵬翀劉起沈曾豐汪存夜王
堅范宗彪結煎茶吟社于庵中

汪存夜蔭天持孫蟻桴詩至疊前韻喜聞嘉客來暑午願束帶袖攜見贈詩赤日自張蓋還

訂竹院過清茶續歡會庭梧葉乍飄哀蟬引秋籟廿年勤清修俗縈久淘汰庶幾引慈航渡

我樊籠外

靜三積福庵僧自幼戒行深嚴未嘗殺一蠅蟲以飯施鬼食晨視之無粒顯年八十謂其徒曰

凡人長齋臨危輒展轉牀尋求死不得必食葷少許然後就斃余若然汝曹毋效此無已盍以

一鷄子置臥榻下足矣後數日疾大漸氣淹不絕其徒如其所屬須臾溘然逝

列女

明

張氏諸生龐松妻居北街嘉靖三十三年倭寇擾境爲賊擄以兵脅辱之投江死

金氏龐沅妻居北街年十九夫亡無子堅志苦守以歿

金氏戴又垣妻初居南翔業磨麵又垣歿索逋者逼氏改志氏挈兩孤逃依夫弟世隆家世隆

撫卹之遂家黃渡之北街年七十完節而卒
國朝

陳氏龐文常妻居陶祁邨氏年十八歸龐歲餘夫病篤即以死誓康熙十七年夫亡視殮舉乘
閒投淵死年二十一

嘉定志未詳
文常名故錄

錢氏七家邨人許字陸浩浩歿矢志守貞奔喪不返撫嗣子成立卒年六十七學政張廷璐給
霜嚴玉潔額浩陸家圩人

青浦志未載
里居故錄

顏氏萬錢妻居萬家宅康熙二十八年夫亡氏年三十遺腹生子淑撫養成立完節五十二年
張氏監生金爾調妻居北鎮年二十九夫亡撫子泓成立完節四十年

蔣氏考授州同洪鈞妾自章堰遷鎮之南街鈞歿氏年二十三守節撫孤道光十七年 詔旌

曹氏金大武妻居鷹房乾隆三年夫亡氏年二十八生子懷宗僅八十日撫孤成立完節五十
五年道光二十一年 詔旌

張氏陸希賢妻居陸家圩年二十四夫亡撫子善昌成立善昌繼歿氏苦守清貧教養孤孫完
節六十二年

黃渡鎮志

卷七

七十一

馬氏何修立妻居馬宅年二十五夫亡子鶴翀甫生五月撫孤成立完節五十五年邑令吳桓
給貞兼養教額

朱氏張宏毅妻居張家邨年二十夫亡以勤苦損其肢恆力疾作女工以養舅姑完節五十三
年

秦氏施南臺妻居文五圖乾隆二十六年夫亡氏年二十六完節四十四年道光二十一年
詔旌

倪氏金漢川妻居文十二圖乾隆三十八年夫亡氏年二十一完節五十五年道光二十一年
詔旌

李氏胡兆熊妻居胡家埭年二十八夫亡完節四十五年學政辛從益給苦節稀齡額
姜氏鄧斐在妻居鄧家角年二十九夫亡子思劬甫三歲撫孤成立完節五十五年

王氏金允其妻居文十四圖乾隆四十年夫亡氏年三十完節四十七年道光二十一年 詔
旌

萬氏金國楨妻居文十二圖乾隆四十四年夫亡氏年二十四完節三十年道光二十一年

詔旌

陳氏單玉海妻居張家邨年二十九夫亡族人令之改嫁同里陶某欲娶之已納聘氏偵知之持刀謂族人曰請斷我頭聽汝所為陶義之戒母奪氏志而弗追其資事遂寢完節三十三年陳氏吳天文妻居麗四圖乾隆四十五年夫亡氏年二十一完節六十年道光二十一年 詔旌

盛氏徐效三妻居赤雁浦年二十八夫亡以夫兄子孟達為嗣孟達繼歿婦錢氏時年三十姑媳相依煢煢苦守並完節而終

丁氏吳九思妻居南鄉年三十夫亡完節三十八年

蘇氏張家珍妻居光南十六圖乾隆五十六年夫亡氏年二十守節四十九年道光二十一年 詔旌

吉氏金陞城妻居文十二圖乾隆五十六年夫亡氏年二十一完節十二年道光二十一年

詔旌

北鎮某婦年二十夫亡守節事姑依夫弟為活夫弟以无妄被累商于鄰人某某力為排解翌

黃渡鎮志 卷七

七十二

日姑往致謝時某方喪偶密示意于其姑欲娶婦以為報姑意未決婦聞之絕食七日而死見吳淞江雜事詩注

姚氏李洪貞妻居文九圖嘉慶八年夫亡氏年二十八守節三十七年道光二十一年 詔旌

孫氏金邦泰妻居文十四圖嘉慶八年夫亡氏年二十九完節二十八年道光二十一年 詔旌

旌

陶氏張汝楫妻居張家邨年二十六夫亡獨居紡績完節四十年

毛氏譚炤妻居唐家邨年二十八夫亡完節四十年道光六年學政辛從益給節苦風清額

吳氏監生金鴻勳妻居北街年二十九夫亡子奎方三歲撫養成立完節四十一年

張氏女居餐橋邨父仲侯業農年十九許字王王以羸弱未娶越五年王歿女聞訃欲視殮家人不許屢泣告母曰兒身已許人今即死兒固彼婦矣母遂其志終為張氏女父母旋歿撫幼

弟百川成立完貞五十七年馬權為之傳

張氏毛友柏妻居毛家邨年三十夫亡友柏素充里長歿時子應昇方十歲吏督之代父役求脫不免乃挈孤按戶催納卒完其額強宗侵其田訟不決令嘉其苦節而平反之完節五十四

年
李氏金燦妻居北街年二十八夫亡撫子莖成立完節十五年
嚴氏李仁驥妻居李家邨嘉慶十年夫亡氏年十九守節三十五年道光二十一年 詔旌
嚴氏李仁麟妻居李家邨嘉慶十一年夫亡氏年十八守節三十四年道光二十一年 詔旌
金氏應國圻妻居北鎮年二十三夫亡宅心柔順德節並稱完節三十年
胡氏蔣淦章妻居蔣家行年二十五夫亡繼姑性嚴氏常隱泣目幾盲延師課子汝枚成立完節十九年學政張芾給貞石流芳額同邑王先琨爲之傳
趙氏陸德隅妻居陸家圩年二十六夫亡遺腹生子時中甫納婦時中病歿兩世孀寡相依爲命完節五十年學政張芾給冰清勵志額
王氏姜六鈞妻居北王邨年十九夫亡子濤生甫三月孤寡相依鼠竊者侮之氏合鄰媪數人徹夜紡織更相守望盜不敢犯事姑盡職完節五十六年
張氏監生陳昌寓妻優貢生彥曾女年二十八夫亡依嗣子銘自安亭遷鎮之北街銘復早歿氏孤守清節三十六年道光二十七年 詔旌

章氏金鳳奎妻居陸家圩年三十夫亡幼習經史親授二子事舅姑盡職道光三年姑陸歿氏一慟而絕完節十七年學政朱方增給徽揚彤史額

張氏應國泰妻年十九夫亡自塔廟依夫從兄居北鎮東市食貧苦守完節四十年

秦氏章寶枝妻定海知縣珂女居南鎮西街嘉慶十二年夫亡氏年二十八撫夫兄子爾忠爲嗣爾忠未娶早亡聘婦張氏歸章守貞事姑以孝張歿氏旋以悲鬱卒完節二十九年張氏完貞二十年學政張芾給貞節流芳額

謝氏金煥妻居北街年二十六夫亡子茂春生甫匝月撫孤成立完節三十六年

金氏徐松年妻居錢涇年二十四夫亡完節三十年

李氏金炳妻居北街年二十一歸金半載夫亡撫子墉爲嗣存年七十一計守節五十年學政龔守正給心貞荼蘼額

戴氏諸生陸德容妻 欽賜副榜鎮女居陸家圩年二十九夫亡存年七十計守節四十一年學政張芾給勵志冰清額

陸氏監生金炯妻居北鎮年二十六夫亡存年六十六計守節四十年學政張芾給霜筠勵節

額

尹氏李士奇妻居南鎮年二十四夫亡存年六十一計守節三十七年

袁氏金正音妻居北鎮年二十五夫亡存年六十計守節三十五年

周氏監生朱森春妻居南鎮年二十六夫亡存年五十九計守節三十二年

吳氏朱恒德妻居朱家邨年三十夫亡食貧紡績以活存年五十八計守節二十八年

史氏監生金源麟妾居北街源麟歿氏年十九偕主婦王撫嗣子成立存年五十九計守節四

十年

應氏監生洪椿繼妻居南鎮年二十四夫亡存年五十計守節二十六年

李氏王新其妻居北街年二十四歸王方旬日夫以暴疾歿存年五十計守節二十六年